

顯揚聖教論卷第二十一

切十

無 著 善 薩 造

唐三藏法師玄奘奉詔譯

攝勝決擇品第十一之四

如是已說覺分決擇補特伽羅勝決擇今當

說頌曰

由根等差別 建立五唯二 假設五應知

三事成圓滿

論曰當知由根等差別故建立五種唯二如

經中說由緣唯二根故唯二作意可知緣唯

二作意故唯二修可知緣唯二修故唯二行  
可知緣唯二行故唯二補特伽羅可知行者

謂修所引習氣又假設補特伽羅應知由五  
種因一由種姓故謂可救不可救二由趣入

故謂聲聞乘等三由學故謂學無學四由得

故謂住四果及三向五由過失功德故謂有

障無障具縛不具縛又由三事故建立三滿

一根滿謂不動法二定滿謂得滅定三果滿

謂阿羅漢如是已說補特伽羅決擇果事決

擇今當說頌曰

證轉依不起 二因果無退 三因故斷常  
三果三因記

論曰由證轉依故諸煩惱不起當知轉依說  
名為斷又由二種因故果無有退謂若未永  
害煩惱種子證阿羅漢不應道理故若已永  
害煩惱種子即應煩惱必定不生種因無故  
又三因緣故斷是常性一無戲論故現見戲  
論是無常性二清淨真如之所顯故猶如真  
金調柔之性三煩惱不生性前後無別故又  
三種果由三因故如來記別一證淨記別謂

預流果由得見道四證淨故二喜處記別謂  
一來果將得根本定已受少喜故三隨念記  
別謂不還果已得根本定現見諸天衆與梵  
衆等共興言論隨念所求自乘功德未圓滿  
故如是已說果事決擇功德決擇今當說頌

初十

曰

建立諸功德 由十七增上 彼差別無邊

治所治障故

論曰當知由十七種增上力故建立功德一  
由慈有情增上故謂四無量二由六障淨增

上故謂解脫勝處遍處此中解脫為方便由  
餘故成滿六障淨者一變化障清淨由前二  
解脫二最極現法樂住障清淨由第三解脫  
淨與不淨皆清淨顯現故三往還障清淨由  
第四解脫四引無諍等聖功德障清淨由第  
五解脫五諸漏及有障清淨由第六第七解  
脫六寂靜最極住障清淨當知由第八解脫  
三由知時往增上故謂無諍功德四由觀察  
所知增上故謂願智五由言教增上故謂無  
礙解脫六由六處善巧增上故謂六神通六

處善巧者一引攝善巧二審聽語言善巧由  
此善巧以彼語言論難折伏為說正法三欲  
解隨眠善巧四來善巧五往善巧六解脫善  
巧七由他信增上故謂諸相好八由三障清  
淨增上故謂四種遍清淨三障者謂所依障  
所緣障心智障九由一切問記增上故謂諸  
力十由摧伏一切他論增上故謂諸無畏十  
一由於所攝衆無偏黨增上故謂諸不護十  
二由能攝化徒衆增上故謂諸念住十三由  
於一切時顯現一切智者所作增上故謂未

拔習氣十四由於所應化不過時增上故謂  
無忘失法十五由日夜六反觀察世間增上  
故謂大悲十六由超過聲聞獨覺增上故謂  
諸不共佛法十七由成諸如來所作事增上  
故謂一切種妙智又此諸功德對治所治障  
差別故當知無邊差別復次頌曰

思惟義樂苦 作意及安住 艱難與相貌  
殊特非殊特

論曰彼諸功德若所對治若能對治皆應思  
惟云何思惟所謂若義若樂若苦若作意若

安住若艱難若相貌若殊特非殊特此中思  
惟義者謂慧到彼岸義所攝諸句有五種所  
為義一為於說者起恭敬義二為攝眾義三  
為於言教起尊重義四為敘述事義五為於  
真實義教起多所作義又一切法有三種義  
謂能增益義所增益義及法性義如色有三  
種能增益色所增益色及色法性如是一切  
處應知復有三輪理趣義宣說諸法謂依世  
俗諦理趣宣說作者宣說作具宣說作業如  
施者施行受施物者謂能行施者由此行施

及施物受者如是一切處應知復有四種理趣言教義一差別理趣言教二建立理趣言教三無異理趣言教四無作用理趣言教此中差別理趣者謂色乃至一切種智性差別建立理趣者謂五種建立一趣入建立二教授建立三學建立四證得建立五過失功德建立無異理趣者有六種一有非有無異謂色與色空性如是一切處應知二更互無異謂諸蘊更互相望如是一切處應知三世無異謂於前際觀中後際如是一切處應知四

補特伽羅無異謂諸有情展轉相望五障治無異謂常無常乃至流轉寂滅六文字無異謂名身等無作用理趣者謂三輪清淨隨於諸處無有作者真實可得無有作具亦無作業無有補特伽羅能說無法可說無補特伽羅能學無法可學無補特伽羅能證無法可證無補特伽羅能住過失及與功德亦無所住無取無法如是一切復有二種無量義一發起問論無量二迴向無所得無量又為對治三種處所故說不應住色義乃至不應住

一切法義三種處所者一執著處所二隨轉處所三戲論慧行處所復有三種無相義一無體無相二非彼體無相三不顯現無相如無相如是無性無自體不生不滅無所執著無所爲作無所攝受應知亦爾復有三種有所得義一事有所得二有所得有所得三無所得有所得如有所得如是有執著爲作戲論取見計執應知亦爾復有三種有所得義一自體有所得二不遠離有所得三不推析有所得復有三種無所得義一自體無所得

二遠離無所得三推析無所得如無所得如是空無執著無爲作無戲論無取無見無計執應知亦爾復有三種無所得義一有性無所得二彼體無所得三不顯現無所得無所得者推求諸法不見自性非一切種都無所得然於遍計所執自性無所得時亦不觀彼依他自相又復經言無所得相應故者若無所得彼相應耶應作四句或無所得非相應者謂如有一於廣大事都無所得或有相應非無所得者謂由世間道修諸善法或無所

得亦相應者謂由出世間道修諸善法或非  
無所得亦非相應者謂染汙及無記法現在  
前復有五種不正取義謂補特伽羅不正取  
法不正取變異不正取損減不正取差別不  
正取復有四種言教義一言定意不定二意  
定言不定三言意俱定四言意俱不定復有  
二種所對治義一解脫門所對治謂分別相  
願二到彼岸所對治謂慳怯犯戒忿恚懈怠  
散亂惡慧復有二種空所對治義謂十六種  
邪想現行及十四種想縛復有二種到彼岸

行義謂世間有所得行及出世間無所得行  
又復世間到彼岸行但是相似非真實如相  
似如是有毒有障無方便應知亦爾當知出  
世間到彼岸行與此相違復次若略說慧到  
彼岸自體義當知由三種相一所依相二所  
緣相三行相所依相者謂菩提心六所緣相者  
謂色等法行相有二種謂世間出世間世間  
行者謂無常苦空無我如病如癰等行出世  
間行者謂無所得相應行復有三種波羅蜜  
多善積集修義一以一切智性相應作意與

一切有情同共迴向阿耨多羅三藐三菩提  
二以諸波羅蜜多安住實際三於實際而不  
作證復次如說此心不可思議故者何因緣  
故不可思議謂由此所依由此所緣令心安  
住此俱無性故若是無性即是清淨亦不可  
思議此不可思議若有性若無性及與彼心  
若是異性若不異性故又復一切戲論行相  
三因緣故令心流轉一由親近故二由所緣  
故三由建立故親近故者謂得報時執持所  
依所緣故者謂領受種種境界及起作種種

加行建立故者謂無始時來忘想熏習復有  
四種分別義一有分別二無分別三二分別  
四不二分別復有四種無分別義一愚癡無  
分別二非情無分別三無作用無分別四法  
性無分別復有二種言教義謂世俗言教勝  
義言教世俗言教者謂差別建立二種理趣  
勝義言教者謂無異無作用二種理趣復次  
於勝義諦中不可宣說於言說中當知有三  
種相一相相二雜染相三清淨相又由三種  
遍知相現觀諸法三種相者一假立二了別

三彼唯量諸菩薩等以何爲樂謂衆生攝益爲樂以何爲苦謂衆生損惱爲苦以何爲作意謂思惟一切衆生利益事爲作意以何爲住謂以無所分別爲住復次菩薩摩訶薩有十二種艱難之事聰睿菩薩應當了知一者於違越法式衆生若罰若捨是諸菩薩艱難之事二者方便現行苦逼惱事防護自心今不起煩惱是諸菩薩艱難之事三者無量衆生現前求索現在所有非法財物是諸菩薩艱難之事四者菩薩唯有一身無量衆生諸

所作事同時現前請爲助伴是諸菩薩艱難之事五者處放逸處若處世間可愛妙定若生天上令心調順是諸菩薩艱難之事六者常求遍作利衆生事而於此事無力無能是諸菩薩艱難之事七者愚鈍詭詐剛強衆生若爲說法若復棄捨是諸菩薩艱難之事八者常於生死見大過失爲利衆生而不應捨是諸菩薩艱難之事九者未證增上清淨意樂多分失念命終是諸菩薩艱難之事十者未證增上清淨意樂他來求索最極第一所

珍愛事是諸菩薩艱難之事十一者種種意見種種樂欲衆生現前若教示若棄捨是諸菩薩艱難之事十二者常行最極不放逸行而不盡斷一切煩惱是諸菩薩艱難之事若諸菩薩遭遇如是艱難之事或應觀其輕重如其所應建立方便或應簡擇補特伽羅或應勵力攝受隨因緣轉若發正願或復制心令不縱逸或應住心猛利觀察不生厭倦而自安忍或慈悲故心生放捨或應發起熾然精進或復思惟善權方便如是正對治善巧

菩薩摩訶薩雖遇如是諸艱難事正現在前而無怯怖自正能免復次有五種真實菩薩相由成就此故入菩薩數云何爲五謂哀愍衆生常說愛語所作勇決舒手惠施能善剖析甚深義節哀愍者有二種性一者樂欲二者正行言樂欲者所謂菩薩於諸衆生起利益意及安樂意言正行者謂諸菩薩於衆生所如其欲樂隨力隨能以身語業而行攝化是名哀愍愛語者歡喜慰喻宣布息德是名菩薩於諸衆生常說愛語所作勇決者謂威

猛無怯成就勝力是名菩薩所作勇決舒手  
惠施者若諸菩薩行廣大施行無染施是名  
菩薩舒手惠施若諸菩薩善能發起四無礙  
解正方便智是名菩薩能善剖析甚深義節  
自體復有五種殊特五種非殊特菩薩相如  
前攝淨義品中說又於功德事中依止大乘  
勝決擇今當說頌曰  
種性如來說 多佛與大乘 五種及十種  
六六種道理  
論曰種性差別大乘言教是如來說於一時

間多佛出世及大乘性如其次第五種十種  
六種六種道理應知問云何種性差別五種  
道理答謂一切界差別可得故無根有情不  
應理故同類譬喻不應理故異類譬喻不應  
理故唯現在世非般涅槃法不應理故云何  
一切界差別可得故謂佛所說諸有情界有  
種種非一有情界有下劣勝妙有情界有聲  
聞乘等般涅槃種性有情界有不般涅槃種  
性有情界云何無根有情不應理故謂不可  
說由此道理亦應得有無根有情何以故以

無根者如外地等非有情故云何同類譬喻不應理故謂不應言如刹帝利非刹帝利等種類可轉及那落迦非那落迦等趣性可轉如是般涅槃不般涅槃種性亦應可轉何以故刹帝利等及那落迦等具足一切種類界性及諸趣界性故般涅槃不般涅槃二種種性更互相違故彼若無有諸界性者彼應畢竟不可迴轉是故同類譬喻不應道理云何異類譬喻不應理故謂不可說如於彼彼地方所或先有彼彼金銀銅鐵鹽等物類種性

後便無有或先無後有如是般涅槃法種性亦應先有後無先無後有何以故若有此理順解脫分應空無果是故異類譬喻亦不應理云何唯現在世非般涅槃法不應理故謂不應言於現在生雖非般涅槃法於餘生中復可轉為般涅槃法何以故無般涅槃種性法故又若於此生先已積集順解脫分善根何故不名般涅槃法若於此生都未積集順解脫分善根云何後生能般涅槃是故定有非般涅槃種性有情問云何應知大乘言教

是佛所說答由十種因故一先不記別故二  
今不可知故三多有所作故四極重障故五  
非尋伺境界故若不先聞不能如是尋思計  
度是故若言是餘所說不應道理六證大覺  
故若未成佛能說佛教不應道理七無第三  
乘過失故八此若無有應無一切智者成過  
失故九緣此為境如理思惟對治一切諸煩  
惱故十不應如言取彼意故問云何應知於  
一時間有多如來出現於世答由六因故一  
無量有情同於一時發大覺願現可得故二

無量有情同修方便善提資糧現可得故三  
更相障礙不應理故四善提資糧同時圓滿  
俱出世間應道理故五次第出現不應理故  
六畢竟不成不應理故問何故如來宣說一  
乘答由六因故一即彼諸法約無差別相說  
故二約無分別行相說故三衆生無我及法  
無我平等故四解脫平等故謂差別求者有  
事虛妄分別煩惱對治所緣法性不相違故  
五善能變化住故六行究竟故復次頌曰  
諸佛妙功能 彼果土清淨 解脫與法身

等不思無上

論曰一切如來於一切所作事功能平等又彼功能果佛國土清淨解脫身及法身一切諸佛皆平等皆不可思議皆無有上應知復次頌曰

雖不用加行 先願力所引 依無爲發起所作無二相

論曰依止無爲法身雖無加行功用由本願力之所引故任運發起一切如來所作佛事譬如行者從滅定起又此所起佛事當知是

無盡相非生死相亦非涅槃相云何素怛嚩藏云何毗奈耶藏云何摩怛履迦藏頌曰  
宣說諸事法 別解脫分別 諸法相十一  
是經律本藏

論曰諸佛世尊唯依攝事顯了諸法是名素怛覽藏問何等名攝事答謂四事九事二十九事何等四事謂聞事歸趣事學事菩提事九種事者一假立有情事二彼所受用事三彼生起事四彼生已住事五彼染汙清淨事六彼種種差別事七能說者事八所說法事

九衆會事二十九種事者謂於遍攝九事經中依雜染品說有四事一攝諸行事二即於此中次第轉事三即於此中立衆生想後轉因事四即於此中建立法想後轉因事又依清淨品說有二十五事一於所緣境安住事二即於此中劬勞重三心安住事四現法樂住事五出一切苦所緣方便事六彼遍知事此有三種謂顛倒依處遍知故依有情想於外有情邪行依處遍知故內離增上慢依處遍知故七修依處事八作證事九修習事十

彼堅固事十一彼行相事十二彼所緣事十三觀斷未斷善巧事十四彼散亂事十五彼不散亂事十六不散亂依處事十七修習無倦方便不遠離事十八修習勝利事十九彼堅固事二十攝賢聖行事二十一攝賢聖品所遠離事二十二真實通達事二十三證涅槃事二十四於善說法律中所得世間正見超過一切外正見事二十五不修習此退減事此由於善說法律中不修習故名爲退減不由邪見過失故復次佛世尊爲諸聲聞及

諸菩薩說別解脫及廣分別別解脫相應法  
是名毗奈耶藏比中由七種相略攝菩薩別  
解脫應知一者宣說受持軌則二者宣說波  
羅闍已迦處事三者宣說默犯處事四者宣  
說毀犯體性五者宣說無犯體性六者宣說  
出所毀犯七者宣說捨律儀事復次佛世尊  
以十一種相顯了分別開示諸法是名摩怛  
履迦藏云何名為十一種相一世俗諦相二  
勝義諦相三菩提分法所緣相四此行相五  
此自體相六得此果相七此領受顯了相八

此障礙法相九此隨順法相十此過患相十  
一此稱讚相世俗相者當知宣說補特伽羅  
宣說遍計所執自性宣說諸法作用業具等  
相勝義相者當知宣說七種真如相菩提分  
法所緣相者當知宣說一切種所知事此行  
相者當知宣說八觀察行何等為八一觀察  
諦行二觀察建立行三觀察過失行四觀察  
功德行五觀察理趣行六觀察流轉行七觀  
察道理行八觀察廣略行諦者謂真如建立  
者謂若建立補特伽羅若建立遍計所執自

性若建立一向分別反問置記論若建立隱  
密顯了記論過失者謂佛所說諸雜染法非  
一種種差別過失功德者如佛所說諸清淨  
法非一種種差別勝利理趣者有六種理趣  
如攝事品已說流轉者謂三世三有爲相及  
與四緣道理者謂四種道理一觀待道理二  
作用道理三證成道理四法爾道理若由諸  
因諸緣故諸行生起及隨顯說是名觀待道  
理若由諸因諸緣故諸法若證得若成滿若  
彼已生能起業用是名作用道理若由諸因

諸緣故所立所說所標舉義得成立得正解  
是名證成道理此復略有二種一清淨二不  
清淨清淨者由五種相不清淨者由七種相  
五種清淨相者一現量所得相二依止現量  
所得相三引自類譬喻相四成就相五善清  
淨言教相此中一切行無常性一切行苦性  
一切法無我性是諸世間現量所得如是等  
類是名現量所得相若一切行剎那性後世  
有性淨不淨業不失壞性此依麤無常現量  
所得依有情種種差別業現量所得及依苦

樂有情淨不淨業現量所得由此現量所得  
故比類所不現見法是名依止現量所得相  
若於內外諸行中引一切世間共知共得生  
滅相引一切世間共知共得生等苦相引一  
切世間共知共得不自在相及於外事中引  
一切世間共知共得興盛衰壞相如是等類  
是名引自類譬喻相即現量所得相及引自  
類譬喻相此二於所成立一向決定故當知  
即名成就相若諸言教是一切智者所說如  
言涅槃寂靜如是等類是名善清淨言教相

此中有五種相能表真實一切智者何等爲  
五一者若有出現世間一切智者正實聲名  
流布世界二者具三十二大丈夫相三者成  
就十力斷諸有情所有疑網四者自稱具足  
四無所畏不爲一切他論難屈又能摧伏一  
切外論五者於其法律八支聖道及四沙門<sup>十五</sup>  
果等可得如是出現故妙相故斷疑故立破  
故道果故由此五相表是真實一切智者如  
是於證成道理中由現量故比量故譬喻故  
成就故至教量故由此五相名爲清淨七種

不清淨相者一餘分同類所得相二餘分異類所得相三一切同類所得相四一切異類所得相五引異類譬喻相六不成就相七不清淨言教相若一切法意識所識性是名一切同類所得相若相貌若自體若業若法若因若果等同異之相或隨一分更互同異之相是名餘分同異類所得相或決定更互異相是名一切異類所得相若并譬喻有餘分同類所得相及有一切異類所得相由此相於所成立義不決定故說名不成就相若并

譬喻有餘分異類所得相及有一切同類所得相由此相於所成立義不決定故亦名不成就相由不成就故名不清淨道理觀此觀不清淨故不應修習不清淨言教相者謂諸言教自性不清淨應知法爾道理者謂若如來出世若不出世法性法界安住無變是名法爾道理略廣者謂先說一句法後後以無量句展轉分別顯了究竟此自體相者所謂能取若行若緣菩提分法四念住等是名此自體相得此果相者謂若世間出世間煩惱

斷果及所引發世間出世間功德是名得此  
果相此領受顯了相者謂由解脫智故即領  
受此所得果相及廣爲他顯說其相是名此  
領受顯了相此障礙法相者謂若修菩提分  
法時能爲障礙染汙之法是名此障礙法相  
此隨順法相者謂即於此菩提分法十六能爲隨  
順多所作法是名此隨順法相此過患相者  
謂能障礙所有過失是名此過患相此稱讚  
相者謂隨順法所有功德是名此稱讚相隨  
所有處諸佛世尊以如是等十一種相顯了

分別開示諸法是名摩怛履迦復次頌曰  
諸相與斷滅 無失壞方便 彼二果差別  
是諸經略義  
論曰當知諸經義略說有五種一相二斷滅  
三無失壞方便四彼二果五相等差別此五  
略說如善生經佛告善生族姓子有二種事  
俱爲美妙者是美妙相斷滅有二種謂欲取  
斷滅及依事取斷滅者此言兼顯二種無失  
壞方便二種無失壞方便者謂若落鬚髮乃  
至趣於非家若盡諸漏乃至覺受我生已盡

乃至廣說彼二果者謂無失壞方便果寂靜  
性差別者謂五種寂靜差別一諸纏寂靜二  
世間離欲寂靜三順下分寂靜四順上分寂  
靜五依事寂靜為顯此故於彼經中說伽他  
曰諸苾芻美妙寂靜離諸漏離欲離繫縛無  
執受涅槃任持最後身摧伏魔所使復次頌  
曰  
略說瑜伽道 緣所聞正法 奢摩他與觀  
依影像成就  
論曰若略說瑜伽道當知多聞所攝正法為

境界奢摩他毗鉢舍那為自體依止影像及  
依止事成就如薄伽梵說有五種法能攝一  
切瑜伽行者諸瑜伽地謂持任明鏡及與轉  
依當知聞正法是持所緣是任止觀是明影  
像是鏡事成就是轉依

顯揚聖教論卷第二十

音釋

慳慳苦閑切 慳慳怯新切 慳慳惜也 艱古閑切 審俞芮切  
 諂諂詐側切 詐詐側切 偽偽也 剖剖也 析析也  
 也也 分分也 也也 也也 也也 也也 也也 也也 也也